

Damain delicts criminals

Grischun: statistica criminala 2015

DA GION NUTEGN STGIER / ANR

■ Il dumber dals delicts criminals en noss chantun è sa diminui il 2015. Registrà han ins total 9448 delicts e quai èn 637 damain che l'onn 2014. Ils pli blers delicts penals hai dà a Cuira e conturn ed ils pli paucs en Surselva. Er en Svizra è il dumber dals delicts sa reduci e quai per 19%. Ier ha la polizia chantunala dal Grischun preschentà a Cuira la statistica criminala da la polizia 2015. *Gianfranco Albertini*, il schef da la polizia criminala da noss chantun, ha ditg che la statistica saja in agid na mo per la polizia, mabain er per la populaziun. I saja ina incumbensa da l'entira societad da tegnair il dumber da delicts uschè bass sco pussaivel. La populaziun sapia prestar ina gronda contribuziun a favur d'in svilup positiv, per exempel dal dumber d'infrazziuns, ella saja dentant er dependenta da bunas infurmaziuns da la populaziun. La polizia e la populaziun dastgan sa chapir sco unitad collectiva, sch'i sa tracta d'impedir delicts, ha menziunà Albertini.

Daplis denunzias cun cas da drogas

L'onn passà ha il Grischun registrà 9448 delicts criminals e quai èn tutina 637 damain che anc l'onn 2014. La gronda part da quels, numnadamain radund 7000, pertutgan il cudesch da dretg penal. Quai ha ditg ier Albertini, il vicecummandant da la polizia chantunala dal



Gianfranco Albertini, il schef da la polizia criminala da noss chantun, ha preschentà ier a Cuira cifras plaschaivlas quai che pertutga la criminalità en il Grischun.

FOTO G. N. STGIER

Grischun. Sa diminui è cunzunt il dumber da delicts da facultad cun in minus da 19% e da delicts cunter la libertad cun in minus da 12%. Las denunzias per cuntravenziun cunter la lescha da drogas èn s'augmentadas dad 1276 cas

sin da nov 1614 cas. Delicts da mazza-ment han ins registrà nagins l'onn passà en il Grischun, dus cun l'intent d'assasinar ina persuna, cun blessuras grevas ovg delicts e cun blessuras levas 107 delicts.

Las personas inculpadas èn tranter 20 e 29 onns

Las personas inculpadas èn per il solit personas tranter 20 e 29 onns. Entaifer questa classa da vegliadetgna èn 84,5% da las personas inculpadas umens.

45,8% dal total da las personas inculpadas èn personas estras, radund la mesadad da quellas viva permanentamain en Svizra. Ils auters 55% delinquentes derivan da la Svizra. La quota totala da scleriment en l'entir chantun importa 36,6% (plus 2%). Per ils delicts cunter il corp e cunter la vita sco er cunter l'integritad sexuala surpassa quella schizunt 90%. En cas da delicts da facultad èn savens avant maun mo paucs indizis. Ultra da quai chaschunan quels delicts scleriments che dovran bler temp e ch'èn cumbinads cun gronds custs. La quota da scleriment tar quels delicts importa 23,2%, analogamain a l'onn precedent.

Cuira e Tavau a la testa

Ils pli blers delicts penals hai dà a Cuira cun in total da 1958 cas, quai ch'èn tutina in minus da 23%. Tavau suonda sin il segund plaz cun total 608 delicts (minus 1%) e lura San Murezzan cun 333 cas da delicts, 17% daplis che anc l'onn 2014 e Landquart cun 326 cas criminals e schizunt in minus da 23%. Damain delicts criminals han ins er gi en Surselva ed en Surmeir, dentant daplis a Tusaun e damain en Tumleasga. Er en Svizra hai l'onn passà dà 19% damain irrupziuns, quai è in minus da record. Cumpareglià cun l'onn 2014 è il dumber d'irrupziuns sa reduci per bunamain 10 000 cas sin totalmain radund 42 000 delicts.